



LAGUNTZA. Sagardoaren produkzioarako beharrezkoak diren makinak eskaintzen ditu Simak enpresak. GARI GARAIALDE / ARGAZKI PRESS

BEHARREZKO LANABESAK

Sagarra jasotzetik eta botilaratu arteko makinak eskaintzen ditu Astigarragako Simak enpresak. Kortxoak merkaturatzen hasi zen hastapenean, baina garai berrietara egokitu da.

Simak enpresak sagardoa egiteko makinak eta kortxoak saltzen ditu. Hogeita bi urte darama Astigarragako enpresak honek sagardogintza alorrean jardunean. Astigarragan hasi aurretik, Donostiako Intxaurrondo auzoan zuten negozioa. Kortxoak egiten zituzten garai haietan, baina ordutik hona gauzak asko aldatu dira, eta garai berrietara egokitu behar izan dute. Sagardoa jasotzetik hasi eta botilaratu arteko zerbitzua eskaintzen dute, bai maila txikiari, bai industrialean.

Makinak eta altzairu herdoilezinezko kupelak dira Simak enpresaren oinarria. Altzairuzko kupelaz gain poliesterezkoak ere badituzte, eta azken horiek egurrezkoen itxura dutela dio Simakeko jabe Iñigo Egimendiak. Altzairua erabiltzeak gauzak aldatu eta erraztu dituela dio, batez ere kupelak garbitzerako orduan. «Egurrezko kupelak bakterio bat sartzen zitzaion barruan, eta ez zegoen handik ateratzerik, sekulako garbiketa emanda ere». Garbitzeko modua ere aldatu egin dela dio. «Lehen, barruan sartzen ziren; baina orain, salbuespenak salbuespen, ez», esan du Egimendiak. Kupelaz gain dolareak, matxakak, botilarako garbigai-

luak, tapoiak jartzeko makinak, kupelak hozteko sistemak... «Guri sagardotegia hutsik eman, eta guk funtzionatzeko behar dituen tresna guztiak jarriko dizkiogu. Sagardotegia betetzea da gure ardura, bai handizka zein xehekako salmentetan», esan du Simakeko jabeak.

Azken berrikuntzen artean, prentsa pneumatikoa erabiltzea dago. Gipuzkoara ekartzen lehenak izan ziren Simakekoak, eta 50 bat jarri dituzte dagoeneko, horietakoren bat 20.000 kilokoa.

Simakek eskaintzen duen beste

berrikuntza bat sagardo hondakinak saihesten dituen makina da. Aurretik sagardogintzak horrelako makina bat izan duela aitortu du Egimendiak, baina espero ziren emaitzak lortu ez zituela gaineratu du. Hori dela eta, sagardogileak beste makina batean inbertitzeko herabetsu daudela dio. «Alor honetan sektoreak erabili dituen makinak ez dira egokienak izan, eta, ondorioz, herabetsu daude orain. Makineria egokia erostean asmatu ez izanak kalte handia egin die. Guk dugun makinarekin ez dugu sagardoa erabat garbi ateraten, pix-

ka bat iluna ateratzen dugu, baina hondakin gehiena kendu diogu. Hori aurrerapen handia da sagardoari zapore gehiago ateratzeko. Hondarrak saihesteko ahalegin handiagoa egin beharko luke sagardogileak», adierazi du Iñigo Egimendiak.

Ezpalezko kortxoak

Makinaz gain, kortxoak ere saltzen dituzte Simaken. Arlo horretan berrikuntzak izan dira ere, kortxo naturala baztertu eta ezpalezkoak erabiltzen dituztelako. «Lehen, kortxo naturalak erabil-

tzen zituzten, baina botilak karbonikoa galtzen zuten. Ezpal oso ona lortu da, eta ezpalezko kortxoak darabilte sagardogileak. Modu honetan karbonikoa mantendu egiten dute; bestela, kortxoak duen edozein porotik ihes egingo luke, eta sagardoa motela geratuko litzateke», azaldu du.

Ingurumenarekiko zaintzak ere gauzak aldatu ditu, orain asko zaintzen baita kontu hori, eta ez du edozein modutan garbitzeak balio. «Orain, garbitzeko materialak biodegradagarriak izan behar dute». Adibide zehatz jarri du ildo horri jarraituz: «Lehen, kupelak kolpearekin, gantzarekin betetzen zituzten, baina orain ez diete uzten».

Aldaketa asko teknologiaren berrikuntzek ekarri dituzte, baina beste asko ingurumena zaintzeko legeek: «Gero eta zorrotzagoak dira. Salmenta bakoitzean ondo bete behar dira fitxa teknikoak». Beste adibide zehatz batekin azaldu du: «Duela urte batzuk, botilak garbitzeko lekua egin nahi genuen, baina ez ziguten utzi, ingurumena zaintzearen».

Aldaketak aldaketa, lan faltarik ez dute. Sagardotegiak irekita dauden garaian egiten dute gutxien, eta itxita direnean gehien, «uztailean eta abuztuan, makinak aldatzen dituztenek garai horretan aldatzen dituztelako». Baina salmenta ondorengo zerbitzua ondo zaindu behar dela dio: «Osoo garrantzitsua da. Gu une oro gaude bezeroei arreta emateko prest. Larunbat gauean etortzen bazaizkigu kortxo eske, eman egiten diegu», kontatu du Egimendiak.



AUKERA. Altzairuzko eta poliesterezko kupelak egurrezkoekin gailendu zitzaie. GARI GARAIALDE / ARGAZKI PRESS